

Հաստատված է
ՀՀ բանկերի միության խորհրդի
15. մայիսի 2010թ. որոշմամբ
Կազմված է 5 թերթից
Տպագրված է 2 օրինակ
Օրինակ N 1

ՀՔՄ նախագահ՝ -----Ա. Ղուկասյան

Հ Ա Յ Ա Ս Տ Ա Ն Ի Բ Ա Ն Կ Ե Ր Ի Մ Ի Ո Ւ Թ Յ Ա Ն

«Ֆ Ի Ն Ա Ն Ս Ա Կ Ա Ն Ա Ր Բ Ի Տ Ր Ա Ժ»

Հ Ի Մ Ն Ա Ր Կ Ի

Կ Ա Ն Ո Ն Ա Գ Ր Ո Ւ Թ Յ Ո Ւ Ն

ք. Երևան-2010թ.

1. ԸՆԴՀԱՆՈՒՐ ԴՐՈՒՅԹՆԵՐ

1.1 Հայաստանի բանկերի միության (այսուհետ՝ ՀԲՄ) «Ֆինանսական արբիտրաժ» հիմնարկը (այսուհետ՝ Ֆինանսական արբիտրաժ), ՀԲՄ կողմից ստեղծված, մշտապես գործող Արբիտրաժ է՝ հիմնարկի կարգավիճակով:

1.2 Ֆինանսական արբիտրաժն իր գործունեությունն իրականացնում է «Առևտրային արբիտրաժի մասին» Հայաստանի Հանրապետության օրենքի, ՀՀ այլ օրենքների և իրավական ակտերի, սույն կանոնադրության, ՀԲՄ խորհրդի կողմից հաստատվող կանոնակարգերի հիման վրա:

1.3 Ֆինանսական արբիտրաժն իրավաբանական անձ չէ, այն ՀԲՄ անունից կարող է ձեռք բերել ու իրականացնել գույքային և անձնական ոչ գույքային իրավունքներ, կրել պարտականություններ:

1.4 Ֆինանսական արբիտրաժի անվանումն է՝

հայերեն լրիվ՝ Հայաստանի բանկերի միության «Ֆինանսական արբիտրաժ» հիմնարկ,

հայերեն կրճատ՝ «Ֆինանսական արբիտրաժ»

ռուսերեն լրիվ՝ Финансовый арбитраж ассоциации банков Армении

ռուսերեն կրճատ՝ Финансовый арбитраж

անգլերեն լրիվ՝ Financial Arbitrage at Union of Banks of Armenia

անգլերեն կրճատ՝ Financial Arbitrage

1.5 Ֆինանսական արբիտրաժն ունի իր հայերեն անվանմամբ կլոր կնիք: Ֆինանսական արբիտրաժը կարող է ունենալ իր անվանմամբ ձևաթղթեր, խորհրդանիշ եւ անհատականացման այլ միջոցներ:

1.6 Ֆինանսական արբիտրաժի գտնվելու վայրն է՝

ք. Երևան, Կորյունի 19 Ա:

1.7 Ֆինանսական արբիտրաժը ստեղծված է համարվում ՀԲՄ խորհրդի կողմից սույն կանոնադրության հաստատման պահից և ենթակա է հաշվառման օրենսդրությամբ սահմանված կարգով:

2. ՖԻԱՆԱՍԱԿԱՆ ԱՐԲԻՏՐԱՅԻ ԻՐԱՎԱՍՈՒԹՅՈՒՆԸ

2.1 Ֆինանսական արբիտրաժի իրավասությանը ենթակա են առևտրային հարաբերություններից բխող այն վեճերը, որոնց լուծումը կողմերը վերապահել են ֆինանսական արբիտրաժին՝ այդ մասին կնքելով արբիտրաժային համաձայնություն:

2.2 Կողմերի արբիտրաժային համաձայնության առկայության դեպքում Ֆինանսական արբիտրաժ դիմելու իրավունք ունեն Հայաստանի Հանրապետության քաղաքացիները, ներառյալ՝ անհատ ձեռնարկատերերը, իրավաբանական անձիք, օտարերկրյա քաղաքացիները (քաղաքացիություն չունեցող անձինք) և իրավաբանական անձինք:

3. ՖԻՆԱՆՍԱԿԱՆ ԱՐՔԻՏՐԱԺԻ ԳՈՐԾՈՒՆԵՈՒԹՅԱՆ ՄԿՋՔՈՒՆՔՆԵՐԸ

3.1. ՀՀ ֆինանսական արբիտրաժի գործունեությունը հիմնվում է օրինականության, արբիտրաժային տրիբունալի անկախության, օրենքի և արբիտրաժային տրիբունալի առջև քաղաքացիների, իրավաբանական անձանց հավասարության, կողմերի մրցակցության և իրավահավասարության, վեճերի օբյեկտիվ, բազմակողմանի, անկողմնակալ, արագ և պրոֆեսիոնալ քննության սկզբունքների վրա:

4. ՖԻՆԱՆՍԱԿԱՆ ԱՐՔԻՏՐԱԺԻ ԳՈՒՅՔԸ ԵՎ ԴՐԱ ՏԻՐԱՊԵՏՄԱՆ, ՕԳՏԱԳՈՐԾՄԱՆ, ՏՆՕՐԻՆՄԱՆ ԿԱՐԳԸ

4.1. Ֆինանսական արբիտրաժը ՀՀ օրենքներով, սույն կանոնադրությամբ ու իր կանոնակարգով սահմանված խնդիրների լուծման համար տիրապետում, օգտագործում և տնօրինում է իրեն անրագրված գույքը, այդ թվում ֆինանսական միջոցները:

4.2. Ֆինանսական արբիտրաժի ֆինանսական միջոցներն ու գույքը օգտագործվում են ֆինանսական արբիտրաժի նախագահի կարգադրությամբ՝ ՀԲՄ-ի նախագահի համաձայնությամբ:

4.3. Ֆինանսական արբիտրաժի գույքը ձևավորվում է ՀԲՄ-ի կողմից վերջինիս կանոնադրությամբ սահմանված կարգով ֆինանսական արբիտրաժին անրագրված գույքից և գումարներից, արբիտրաժային վճարներից և ֆինանսական արբիտրաժին հատկացվող այլ գումարներից:

4.4. Օրենքով և սույն կանոնադրությամբ սահմանված կարգով Ֆինանսական արբիտրաժի գործունեությունից առաջացած դրամական միջոցներն առաջնահերթության կարգով ուղղվում են արբիտրների հոնորարների, վարչական ծախսերի և կանոնակարգով սահմանված Ֆինանսական արբիտրաժի այլ ծախսերի վճարմանը: Մնացած գումարներն ուղղվում են Ֆինանսական արբիտրաժի և ՀԲՄ-ի կանոնադրական խնդիրների իրագործմանը:

5. ՖԻՆԱՆՍԱԿԱՆ ԱՐՔԻՏՐԱԺԻ ԿԱՌՈՒՅՎԱԾՔԸ

5.1. Ֆինանսական արբիտրաժն ունի նախագահ և արբիտրներ:

5.2. Ֆինանսական արբիտրաժի նախագահը, որը համարվում է նաև արբիտր, նշանակվում է ՀԲՄ խորհրդի կողմից՝ հինգ տարի ժամկետով:

5.3. ՀԲՄ խորհուրդը հաստատում է արբիտրների անվանացուցակը, որից վիճող կողմերը կարող են ընտրել արբիտրներ:

5.4. Ֆինանսական արբիտրաժի արբիտրներ կարող են լինել դիպլոմավորված կամ մագիստրոսի կոչումով բարձրագույն իրավաբանական կրթություն, ֆինանսաբանակային համակարգի առնվազն երեք տարվա ընդհանուր աշխատանքային կամ իրավաբանական խորհրդատվության փորձ և դատաիրավական գործունեության փաստացի փորձ ունեցող անձինք:

5.5. Ֆինանսական արբիտրաժն ունի իր աշխատակազմը, որի կառուցվածքը և հաստիքացուցակը ֆինանսական արբիտրաժի նախագահի ներկայացմամբ հաստատում է ՀԲՄ խորհրդի նախագահը:

6. ՖԻՆԱՆՍԱԿԱՆ ԱՐՔԻՏՐԱԺԻ ԿԱՌԱՎԱՐՈՒՄԸ

6.1. Ֆինանսական արբիտրաժի ընդհանուր կառավարումը, որպես հիմնադիր, իրականացնում է ՀԲՄ-Ն՝ օրենքներով, իր և սույն կանոնադրությամբ սահմանված կարգով:

6.2. Ֆինանսական արբիտրաժի կառավարմանը վերաբերող բոլոր իրավասությունները ՀԲՄ անունից իրականացնում են ՀԲՄ խորհուրդը կամ ՀԲՄ նախագահը՝ համաձայն ՀԲՄ-ի և սույն կանոնադրության:

6.3. ՀԲՄ խորհրդի իրավասության հարցերն են.

6.3.1 Ֆինանսական արբիտրաժի կանոնադրության հաստատումը, դրանում փոփոխությունների և լրացումների կատարումը, ինչպես նաև կանոնադրությունը նոր խմբագրությամբ հաստատելը,

6.3.2. Ֆինանսական արբիտրաժի կանոնակարգի, դրա փոփոխությունների հաստատումը,

6.3.3. Ֆինանսական արբիտրաժի նախագահի նշանակումը և նրա լիազորությունների վաղաժամկետ դադարեցումը, վարձատրության չափի որոշումը,

6.3.4. Ֆինանսական արբիտրաժի արբիտրների կազմը՝ անվանացուցակը հաստատելը, դրանում փոփոխություններ կատարելը, արբիտրների լիազորությունների վաղաժամկետ դադարեցումը,

6.3.5. Ֆինանսական արբիտրաժի վարչակազմակերպական կառուցվածքի և հաստիքացուցակի հաստատումը,

6.3.6. Ֆինանսական արբիտրաժի գործունեության դադարեցումը,

6.3.7 ՀՀ օրենսդրությամբ և սույն կանոնադրությամբ ՀԲՄ խորհրդին վերապահված այլ լիազորություններ:

6.4 ՀԲՄ նախագահի իրավասության հարցերն են .

6.4.1. Ֆինանսական արբիտրաժին ամրակցվող գույքի կազմը և չափը որոշելը,

6.4.2. Ֆինանսական արբիտրաժի աշխատակիցների վարձատրության չափը հաստատելը՝ Ֆինանսական արբիտրաժի նախագահի ներկայացմամբ:

6.4.3. ՀՀ օրենսդրությամբ, սույն կանոնադրությամբ և Ֆինանսական արբիտրաժի Կանոնակարգով ՀԲՄ նախագահին վերապահված այլ լիազորություններ:

7. ՖԻՆԱՆՍԱԿԱՆ ԱՐՔԻՏՐԱԺԻ ՆԱԽԱԳԱՀԻ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ

7.1. Ֆինանսական արբիտրաժի նախագահը՝

7.1.1. ղեկավարում և կառավարում է ֆինանսական արբիտրաժի ընթացիկ գործունեությունը, բացառությամբ այն հարցերի, որոնք Օրենքով և սույն կանոնադրությամբ վերապահված են ՀԲՄ-ի իրավասությանը.

7.1.2. կազմակերպում է ֆինանսական արբիտրաժի և աշխատակազմի գործունեությունը.

7.1.3. առանց հատուկ լիազորագրի ներկայացնում է ֆինանսական արբիտրաժը Հայաստանի Հանրապետությունում և արտասահմանում.

7.1.4. իրականացնում է ֆինանսական արբիտրաժի արբիտրներին վերապահված բոլոր լիազորությունները.

7.1.5. կազմակերպում է արբիտրաժային դատավարության պրակտիկայի ուսումնասիրումը և ամփոփումը, ֆինանսական արբիտրաժում քննված գործերի վիճակագրության վարումը.

7.1.6. տնօրինում է Ֆինանսական արբիտրաժի գույքը՝ ՀԲՄ նախագահի համաձայնությամբ.

7.1.7. ապահովում է ֆինանսական արբիտրաժի բնականոն գործունեության կազմակերպումը.

7.1.8. ՀԲՄ խորհրդի հաստատմանն է ներկայացնում ֆինանսական արբիտրաժի գործունեության մասին եռամսյակային հաշվետվությունները.

7.1.9. իրականացնում է սույն կանոնադրությունից և ֆինանսական արբիտրաժի կանոնակարգից բխող այլ լիազորություններ:

7.2 Ֆինանսական արբիտրաժի նախագահն օրենքով սահմանված կարգով գույքային պատասխանատվություն է կրում իր հակաօրինական գործունեության արդյունքում ՀԲՄ-ին և Ֆինանսական արբիտրաժին պատճառված գույքային վնասի համար: Ֆինանսական արբիտրաժի նախագահի լիազորությունների դադարեցումը չի կարող հիմք հանդիսանալ պատճառված նյութական վնասները հատուցելու պարտավորությունները չկատարելու համար:

7.3. ֆինանսական արբիտրաժի նախագահի բացակայության դեպքում նրա լիազորություններն իրականացնում է ֆինանսական արբիտրաժի արբիտրների անվանացուցակում ընդգրկված արբիտրներից մեկը՝ ՀԲՄ խորհրդի նախագահի հաստատմամբ:

8. ՖԻՆԱՆՍԱԿԱՆ ԱՐԲԻՏՐԱՅԻ ԳՈՐԾՈՒՆԵՈՒԹՅԱՆ ԴԱԴԱՐԵՑՈՒՄԸ

8.1 Ֆինանսական արբիտրաժի գործունեությունը դադարում է օրենսդրությամբ և սույն կանոնադրությամբ սահմանված կարգով:

8.2 Ֆինանսական արբիտրաժի գործունեությունը համարվում է դադարած՝ այդ մասին ՀԲՄ խորհրդի որոշումն ուժի մեջ մտնելու պահից: